

**Muhyiddin Mahu Jentera BN Bekerja Keras Walaupun P/Raya Belum Diumumkan Bernama**  
**2 Mac, 2012**

KUALA LUMPUR, 2 Mac (Bernama) -- Timbalan Perdana Menteri Tan Sri Muhyiddin Yassin Jumaat menggesa anggota dan jentera Barisan Nasional (BN) supaya bekerja keras walaupun pilihan raya umum belum diumumkan bagi mengekalkan kemenangan parti itu.

Anggota Parlimen Setiawangsa Datuk Seri Zulhasnan Rafique berkata perkara itu disampaikan oleh Muhyiddin, yang juga Pengerusi BN Wilayah Persekutuan, ketika menghadiri taklimat khas tertutup bersama pemimpin Umno Bahagian Setiawangsa.

"Beliau selaku pemimpin selepas Perdana Menteri, memberi mesej kepada kita untuk bekerja keras sekarang ini walaupun pilihan raya belum diumumkan, dan semua pemimpin akar umbi tadi melaporkan (kepentingan) kita perlu bekerja keras bagi mengekalkan kemenangan BN di Setiawangsa.

"Selepas ini, kita akan menggerakkan aktiviti tertentu yang telah dibincangkan di kalangan akar umbi," katanya kepada pemberita selepas taklimat di Pusat Khidmat Wakil Rakyat Parlimen Setiawangsa, di sini.

Muhyiddin hari ini mengadakan lawatan kerja ke Parlimen Setiawangsa selepas Parlimen Wangsa Maju, untuk menemui pemimpin di peringkat akar umbi bagi mendapatkan maklum balas dan meneliti situasi politik di kawasan berkenaan.

Zulhasnan berkata pihaknya memberikan taklimat selama kira-kira sejam berhubung isu-isu semasa.

Katanya Timbalan Perdana Menteri berpuas hati berhubung situasi politik dan suasana kesejahteraan di Setiawangsa termasuk daripada segi prasarana, kesihatan dan sosial.

"Kita hanya bincang mengenai Parlimen Setiawangsa, bincang strategi terkini, kita akur untuk turun padang dan bekerja kuat bagi mengekalkan kemenangan BN di Setiawangsa," katanya.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=649579>